

**ANG****Bayan**

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Edisyong Hiligaynon
Tuig XXXVII No. 1
Enero 7, 2006
www.philippinerevolution.org

Editoryal

Angkunon ang mas dalagku nga kadalag-an subong nga tuig

Sa basehan sang mga signipikanteng pagsulong sang 2005 kag nagligad nga mga tuig, yara sa pusisyon ang Partido, ang Bag-ong Hangaway Banwa, ang rebolusyonaryong kahublagang masa kag ang nagalapad nga nagahiliugyong prente para sa labi pa nga bumwelo kag mag-angkon sang mga breyktru sining 2006 kag maabot nga mga tuig.

Sa nagligad nga tuig kag ilabi na sa ulihing kwarto, tumampok ang mga kadalag-an sa patag sang armadong paghimakas bunga sang pagbwelo sang mga taktikal nga opensiba sa bilog nga pungsod. Kadungan sini, nag-angkon sang dalagku nga kadalag-an sa pagpasulong kag pagpalapad sang nagahiliugyong prente sa paghimakas para pukanon ang bulok kag brutal nga papet nga rehimeng Arroyo. May dalagku nga pag-uswag man sa paghulag sang ligal nga demokratikong kahublagang masa. Kina-



hanglan na lamang sini nga dugang pa nga makabwelo tubtub masarang-gan na sini pukanon ang ginakangil-aran nga rehimeng Arroyo.

Sa tuig nga ini, ginalauman naton maangkon ang mas dalagku nga kadalag-an kag breyktru sa

nagkalain-lain nga patag sang rebolusyonaryong hilikuton. Hugot ang panawagan sang Partido sa bilog nga katapuan, sa hangaway sang banwa kag sa bilog nga rebolusyonaryong kahublagan nga sistematiko nga himuon ang mga pagplano kag ubos-

***Mga tampok
sa isyu nga ini...***

**32 armas, naagaw sg
BHB sa Leyte**

PAHINA 3

**Padayon ang paghi-
makas sa Hacienda
Luisita**

PAHINA 6

**Kampo nga maki-Ar-
royo, nagakapihak**

PAHINA 8

kusog mag-amot agud magsulong sang daku kag mas madasig ang rebolusyonaryong kahublagan. Nagaluntad ang mga kundisyon para sa posible nga pag-ibwal sang pangpulitika nga sitwasyon sa maabot nga mga bulan. Maghulag kita sing madasig kag tinguhaon isuksok sa masunod nga pila ka bulan ang pila ka tuig.

Dapat hingalitan ang padayon kag madasig nagaluto nga mga sangkap padulong sa pagkapukan sang rehimenng Arroyo kag pagtukod sang kabaylo nga bag-ong gubyrno sa malapit nga inadlaw. Dapat muklat nga planuhan, mapagsik ipanawagan kag gilayon ipatuman ang mga tikang sa dugang pa nga pagpalapad kag pagpabakod sang nagahiliugyong prente nga anti-Arroyo kag pagpahulag sang ginatus-gatos ka libo tubtub minilyun-milyon nga pumuluyo sa karsada. Nagakinahanglan ini sang dugang nga rebolusyonaryong kapagsik, pagtinguha kag pagkamatinugahon sa pagkumbinar sang mga isyu pangpulitika kag sosyo-ekonomiko kag nagkalain-lain nga taktika sa malaparan nga ahitasyon, edukasyon

kag pagpahulag sa masa para patalsikon ang rehimen.

Dapat pangibabawan ang madamu nga sablag nga ginalatag sang rehimen sa tuyo sini nga tiplangon kag pahugon ang masa kag tapnaon ang ila kahublagang protesta.

Kadungan sini, dapat ipabilin ang bwelo sang mga taktikal na opensiba. Pat-uron ang pagkumpiska sang daku nga numero sang armas. Isentro ang mga opensiba pangunahon sa mga yunit kag elemento sang militar kag pulisya nga maki-Arroyo kag sa mga pasista, pinakagrabe nga nagalapas sa mga tawhanong kinamatarung kag aktibo nga nagabatu sa rebolusyonaryong kahublagan. Bunalan ang mga pasistang haligi sang rehimen. Dugang nga pabaskugon ang hangaway sang banwa kag mga rebolusyonaryong pwersa.

Dapat pa nga pasingkion ang hilikuton pangpulitika kag rebolusyonaryong sa sulod sang pwersa militar kag pulisya sang gubyrno agud mapalambo ang patriyotiko kag demokratikong kawsa ilabi na sa kubay sang mga manubo nga upisyal kag ordinaryong suldado.



Tinguhaon naton makatukod sang hulu-halintang nga alyansa sa mga elemento nga disgustado kag anti-Arroyo, antipasista kag naathagan kag habigon ang mga progresibo kag rebolusyonaryong elemento sa ila kubay.

Dapat man makatukib sang mas pat-ud kag mapag-on nga kasugtanan sa sulod sang malapad kag taktikal nga alyansa sa komun nga pagtinguha nga pukanon ang gubyrnong Arroyo, bululigan ang pagtukod sang patriyotiko kag demokratikong gubyrno nga transisyunal nga kabaylo sini padulong sa pag-agum sang tunay, matarung kag pangmalawigan ng kalinungan.

Katungdanan sang tanan nga yunit sang Partido kag rebolusyonaryong kahublagang masa nga balayon kag isakongkreto ang mga ispesipikong plano sandig sa amo nga mga tum-ok kag sa pangkabilugan nga mga ubay nga ginlatag sang Komite Sentral sa pahayag sini sa ika-37 anibersaryo sang Partido. AB



Tuig XXXVII No. 1 Enero 7, 2006

Ang *Ang Bayan* ginabantala sa lengwahe nga Pilipino, Bisaya, Iloko, Hiligaynon, Waray kag Ingles.

Mahimo ini i-download halin sa *Philippine Revolution Web Central* nga makit-an sa:

www.philippinerevolution.org

Nagabaton ang *Ang Bayan* sang mga kontribusyon sa porma sang mga artikulo kag balita. Ginabuyok man ang mga bumalasa nga magpaabot sang mga saway kag rekomendasyon sa ikauswag sang aton pahayagan.

Malab-ot kami paagi sa e-mail sa: angbayan@yahoo.com

Kaundan

Editorial

Angkunon ang mas dalagku nga kadalag-an subong nga tuig **1**

Mas mabaskog nga opensiba, igalunsar sa Mindanao **3**

Mga taktikal na opensiba

32 armas, naagaw sa Leyte **4**

Pulis, gin-ambusan sa Masbate **4**

Militar, napapas sa Cagayan **4**

Armadong aksyon sa Mindanao **5**

Paghimakas sa Hacienda Luisita **6**

Koalisyonng maki-Arroyo, nagakapihak **8**

Gimik ni Arroyo sa Meralco **9**

Paniniktik ni Bush, binatikos **10**

Balita **12**

Ang *Ang Bayan* ginabantala duha ka beses kada bulan sang Komite Sentral sang Partido Komunista sang Pilipinas

Mas mas masingki nga opensiba, igalunsar sang BHB sa Mindanao

Lauman ang labing pagsingki pa sang mga taktikal nga opensiba militar sang Bag-ong Hangaway sang Banwa (BHB) sa Mindanao subong nga 2006. Ini ang gindeklarar ni Jorge "Ka Oris" Madlos, tagapamaba sang National Democratic Front-Mindanao sa pagsaulog sang ika-37 anibersaryo sang liwat nga pagtukod sang Partido nga ginhiwat sa isa ka sonang gerilya. Gintambungan ini sang may 2,00 katapu sang Partido, Pulang hangaway, mga aktibista kag myembro sang mga rebolusyonaryo nga organisasyong masa, mga mama-hayag kag madamu pa nga ibang kaabyanan. Ginkalipay sa pagtilipon ang madinalag-on nga taktikal nga opensiba nga ginalunsar batuk sa mga armadong pwersa sang rehimeng US-Arroyo sa nagligad nga tuig.

Suno kay Ka Oris, ang 182 taktikal nga opensiba nga ginlunsar sang BHB sa Mindanao nagdamu sang 300% sa mga taktikal nga opensiba sa isla sadtong 2004. Siyento kwatro (104) diri ginlunsar sa ulihi nga kwarto sang tuig. Nakatipon ang BHB sa isla sang 210 nga nagkalain-lain nga kalibreng armas, 40% nga mas madamu sangsa masobra 150 armas nga naagaw sadtong 2004. Nagneto ini sang dugang nga 196 armas.

Nag-abot sa 185 ang mga mersenaryong tropa nga napapas kag 147 ang napilasan sa mga taktikal nga opensiba sang BHB. Samtang, 14 ka Pulang hangaway ang nagbuhis sang ila kabuhi, 18 ang napilasan kag siyam nga gerilya ang nabihag sang reaksyunaryong kaaway.

Madamu ang naangkon nga kadalag-an sa pagpasulong sang armadong paghimakas sa Mindanao bunga sang kalapad kag kadalum sang baseng masa didto sang BHB. Suno kay Ka Oris, may ara nga 38 prenteng gerilya sa Mindanao. Nagasakup ini sa 1,500 baryo sa 200 banwa. Sa kabilugan nga 25 prubinsya nga ginahulagan subong, 18 sini ang may presensya sang BHB. Siling niya, nagalapad ang pangpulitika nga impluwensya sang ar-

madong rebolusyonaryong kahublagan. "Masobra ginatus-kalibo na ang ginasakup sang mga rebolusyonaryong organo sang gahum pangpulitika kag organisasyong masa sa lebel sang banwa, baryo, komunidad kag sityo, samtang sa mga erya sang ginapalapan kag ginabawi, napalapad pa naton ang pangpulitika nga impluwensya kag nagaabot na ini tubtub sa kasyudaran kag sentrong banwa." Nagahulag man ang mga armadong partisano sang BHB sa kasyudaran.

Sa patag sang rebolusyong agraryo, ginpahayag sang NDF-Mindanao nga "paagi sa hugot nga pagpamuno sang Partido, nasustenir kag napalapad pa ang antipyudal nga kahublagang masa sa tunga sang mabaskog nga pagpang-atake sang kaaway. Libu-libo nga masang mangunguma ang nag-agum sang mga benepisyo diri, pareho sang pagpataas sang suhol, pagpanubo sang arkila sa duta kag gamit sa uma, pagpanubo sa usura, pagpataas sang presyo sang ila produktong agrikultural kag pagpanubo sang presyo sang balaklon. Kaangot sini, nalunsar ang mga kampanya sa pagpataas sang produksyon, sa serbisyo sa ikaayong lawas, edukasyon kag pangkultura nga pag-uswag, pagdepensa sa du-



ta sang katigulangan, kag sa rehabilitasyon kag pagpangapin sa kapalibutan. Napatuman man ang rebolusyonaryong hustisya, katawhayan kag kalinungan, kag napunggan ang paglapnag sang ginabawal nga droga kag iban nga porma sang kriminalidad sa aton mga erya."

MRLO, gintukod. Sa pihak sang nagasingki nga pasismo sang estado, padayon nga nagalapad kag nagalig-on ang nagahiliugyong prente sa Mindanao samtang nahamulag naman kag nagaluya ang rehimeng US-Arroyo, suno sa NDF. Natukod man sadtong nagligad nga tuig ang Moro Resistance and Liberation Organization (MRLO) samtang ginapabaskog ang pagbuligay sa mga grupo kag indibidwal sa kubay sang pumuluyong Moro.

Ginareport man sang Komisyon sang Mindanao sang Partido nga nagdaku ang katapuan sang Partido sa bilog nga isla. Patimaan ini nga padayon nga nakalapad kag nakaugat ang Partido sa mga baryo, komunidad, empresa, eskwelahan, upisina kag mga institusyon, kag epektibong nakapamuno sa pagpabaskog sang armadong paghimakas kag rebolusyonaryong kahublagan sang pumuluyo batuk sa tanan nga reaksyon kag labi na sa nahamulag nga rehimeng US-Arroyo.

AB



32 armas, naagaw sa Leyte

TRENTA'Y dos nga armas naagaw sang mga gerilya sang Bag-ong Hangaway sang Banwa (BHB) sa reyng wala lupok sa istasyon sang Philippine National Police (PNP) sa Albura, Leyte sadtong gab-i sang Enero 6. Nakumpiska ang 20 nga M16, siyam ka .38 rebolber, isa ka super .38 pistola kag isa ka .40 kal. pistola kag isa ka .22 kal. riple. Luwas sini, nakakumpiska man sang duha ka *base radio* kag mga *cellphone*.

Gingamit sang mga gerilya sa idalum sang North Leyte Command ang temporaryo nga pagkadula sang kuryente sa Albura agud palibutan ang istasyon kag kuhaon ang mga armas. Wala na makabatu ang mga pulis.

Mga pulis, ginlambatan sa Masbate

LIMA ka pulis ang napatay sa pag-ambus sang BHB sa Claveria, Masbate sining Enero 6. Base sa inisyal nga report, sakay sang isa ka trak ang 10 elemento sang gintingub nga mga pwersa sang Claveria Municipal Police Office kag Regional Mobile Group (RMG) sang PNP. Ginpaulanan sila sang bala matapos palukpan sang *land mine* ang ginasakyan nila nga trak bandang 10:30 sang aga sa Sityo San Jose, masobra isa ka kilometro halin sa sentro sang Claveria. Duha ka pulis ang napilasan. Walo ka armas (isa nga kal. 30 masinggan, duha nga M14, apat nga M16 kag isa ka 9 mm) ang nakumpiska sang BHB.

Gilayon nga nangayo sang pasaylo si Gregorio "Ka Roger" Rosal, tagapamaba sang PKP, sa pagkalamita sang tatlo ka sibilyan kag pagkapilas sang duha pa sa ambus. Handa ang BHB

nga maghatag sang ano man nga mabulig sa pamilya sang mga nadalahig nga sibilyan. Ginsiling man niya ang insidente pagaimbestigahan sang natungdan nga kumand sang BHB.

Kadungan sini, ginkundenar ni Rosal ang PNP-RMG sa hungod nga pagbutang sa peligro sa kabuhi sang mga sibilyan. Gingamit sang mga pulis sa ila operasyong militar ang trak nga dala sang mga sibilyan nga empleyado sang meyor. Siling ni Rosal. Nahibal-an gid sang mga pulis ang posibilidad nga matabo ang armadong engkwentro bangud pakadto sila sa Sityo San Jose matapos nga makabaton sang report nga may yunit sang BHB didto. Sa sitwasyon nga ina, ang pag-angkas nila sa trak upod ang mga sibilyan kag pagbutang sa ila sa peligro irresponsable katama.

AB

29 tropa militar, napapas sa Isabela

Naglab-ot sa 29 nga tropa sang militar sang mga Pulang hangaway sang Bag-ong Hangaway sang Banwa sa duha ka magsunod nga taktikal nga opensiba nga ginlunsar sini sadtong Disyembre 16 sa Jones, Isabela. Lakip sa mga napatay si Lieutenant Reyes sang 52nd Reconnaissance Coy sang Philippine Army.

Suno sa report ni Ka Delio Baladon, tagapamaba sang Benito Tesorio Command sang BHB sa Southern Cagayan Valley, may nabaton nga impormasyon ang BHB sadtong Disyembre 15 halin sa lambat paniktik nga masulod ang mga tropa sang kaaway sa mga baryo sang Jones. Lambatan tanan sang BHB ang nagsulod nga 25-katawong yunit sang Philippine Army pero nagbase ang nasambit nga yunit sa mga balay sang mga mangunguma sa Sityo Diarao Surong, Barangay Dicamay Dos


kag wala na maghalin didto.

Gindesisyunan sang kumand sang BHB sang masunod nga adlaw nga palargahon ang tatlo-katawong tim sang mga isnayper agud birahon ang mga tropa militar. Samtang, nagbantay naman ang kadam-an sang pwersa sang platon sa posibleng reimporsment sang kaaway kon nabira na ang

iban nilang tropa.

Sa bulig sang masa, nahibal-an sang mga isnayper nga nakabase sa tatlo ka balay ang kadam-an sang mga kaaway. Pro ang pila sa ila yara sa isa ka kamalig nga wala tao. Naga-inuman kag nagsinugal ang mga ini samtang ang iban nakahigda sa ila mga duyan.

Pumwesto ang tim sang mga isnayper sa isa ka ka bulod nga mas o menos 250 metros ang kalayuon halin sa kamalig nga ginahamtangan sang mga pasistang militar. Bandang 12:30 sang hapon sang magguwa ang isa ka suldado agud mag-ihi. Matapos birahon ang naga-ihi nga suldado, ginunsentrhan sang mga lupok sang mga isnayper ang sulod sang kamalig. Apat ang gilayon napatay sa operasyong is-



Sundan sa "Isabela...", pahina 5



Pinakaulihi nga armadong aksyon sa Mindanao

12 armas, naagaw sa reyd sa Agusan del Sur. Napulo'g duha ka armas ang natipon sa reyd sang BHB sa hedkwarters sang pulisya sa munisipyo sang Loreto, Agusan del Sur sadtong Disyembre 21. Suno sa report ni Ka Boyet Makatindog, tagapamaba sang Front 34 Operational Command sang Agusan-Davao, pito nga M16, tatlong M14, isa ka .45 kag isa ka 9 mm ang naagaw sang mga Pulang hangaway.

Bandang alas-2:30 sang hapon sang salakayon ang istasyon sang PNP sang mga Pulang hangaway nga lulan sang apat nga *van*. Sa napulo ka pulis nga naabutan sa istasyon, nga ginabug-usan sang Regional Mobile Group kag Loreto-PNP, tatlo lang ang nagdesisyon magbatu. Duha sa pulis ang napatay matapos ang 10-minutos nga inaway. Antes mag-

atras ang mga nagreyd, ginpadapatan nila sang pauna nga tambal kag ginsiguro nga madala sa bululngan ang isa nga napilasan nga pulis.

Espesyal nga operasyon sa Tagum City. Isa ka espesyal nga operasyon ang ginlunsar sang mga operatiba sang Ka Paking Guimbaolibot Red Partisan Brigade sadtong Disyembre 20 batuk sa Control Unit Command sang 404th Infantry Brigade sang Philippine Army nga ginapamunuan ni Capt. Marcelo Quitiquit. Apat nga suldado ang napatay sa operasyon nga ini. Duha ka M16 ang naagaw sang mga partisano.

Kilala ang 404th Infantry Brigade sa mabaskog nga pagpang-abuso sa tawhanong kinamatarung. Malaba ang listahan sang mga krimen kag kasal-anan sini sa pumuluho sa Compostela Valley kag

Davao Oriental, pareho sang pagpamatay, pagpanortyur, arbitraryo nga pag-aresto kag detensyon, harassment kag pag-istraping sa mga sibilyan.

Reyd sa protektor sang pasugalan. Lima ka armas naman ang nakumpiska sang BHB sa isa ka reyd sa balay ni SP04 Rogelio Mier, isa ka notoryus nga pulis sa Zamboangita, Malaybalay City, Bukidnon sadtong Disyembre 20. Naagaw ang isa ka M16, isa ka 9 mm nga pistola, isa ka .45, duha nga .22 kal. riple, luwas pa sa isa ka *night vision telescope*, mga *bullet proof vest*, isa ka kamera, kag sari-saring bala. Si Mier protektor sang sugalan kag pinuno sang Delamance Group nga nagahimo sang mga pagpangholdap sa mga balay kag pagpanalbeyds sa lugar. AB

"Isabela..." halin sa pahina 4

nayping nga ini, lakip ang isa ka sarhento. Naghalin ang mga isnayper sang BHB sa ila pwesto agud magsimpon liwat sa platon.

Sang mabatian naman sang platon sang BHB ang lukpanay, gilayon ini nga pumusisyon sa lindero sang Barangay Sta. Isabel kag Barangay Dicamay Dos nga malapit salugar sang isnyaping. Maukod nila nga ginabantayan ang posible nga reimporsment sang kaaway.

Nakasimpon gid lang sang tim sang mga isnayper sa ila platon sang makita sang mga gerilya sa teleskopyo ang pag-abot sang mga tropa sang militar sa lindero sang Sta. Isabel kag Dicamay Dos. Sa bulod ang iban nga kaaway—nakapungko kag nagalargabista man. Maabtik nga nag-areglo sang pusisyon ang platon sang BHB para sa isa ka ambus. Wala magdugay nakita nila nga nagpanaog na ang ma-

sobra 60 tropa sang 52nd Reconnaissance Coy halin sa bulod.

Ang kalupaan nga ila nahamtangan malapad nga pundok-pundok sang mga bulod—nga mahawan katama luwas sa pila ka manipis nga punsok sang mga puno sang saging, pila ka puno sang Gmelina kag pila ka magagmay nga payag. Nagkober lang ang mga Pulang hangaway sa bulu-bungsod sang mga duta kag manipis nga punsok sang mga puno sang saging. Ang iban nakahapa sa manipis nga hilamon.

Bandang alas-2 sang hapon sang umpisahan nila nga palukpan ang kaaway. Madamu ang gilayon nga napatay sa una nga hugnat sang mga lupok. Upod sa mga gilayon nga namatay ang puno nga upisyal nga si Lieutenant Reyes. Bangud kalbo ang kalupaan kag mataas ang mga bulod, indi makadalagan pasaka ang mga suldado agud magatras. Isa pa madanlog katama ang

mga burol bangud pila ka adlaw nga naga-inulan. Gani nagsuksok na lang ang kaaway sa likod sang mga Gmelina ukon indi gani nagpataypatayan. Halin nga matumba ang ila kumander, nangin disorganizado na ang pagbatu sang mga suldado.

Nagdugay ang inaway sang tubtub alas-4 sang hapon. Nag-atras na ang platon sang BHB pag-abot sang reimporsment sang kaaway nga naarmasan sang mga masinggan kag mortar. Makaligad sini naisip sang mga mangunguma nga 25 ang hinakot nga mga bangkay sang kaaway.

Pareho sang una, gintuyo nga takpan sang kaaway ang ila kapaslawan. Suno kay Capt. George Domingo, tagapamaba sang 502nd Brigade, anum lamang nga tropa sang 52nd Reconnaissance Coy ang namatay kag apat ang napilasan sa Sta. Isabel. Wala na niya ginsambit ang natabo sa Sityo Diarao Subong, Dicos Dos. AB

Padayon ang paghimakas sa Hacienda Luisita

Matapos maangkon ang serye sang mga kadalag-an, nagapadayon pa nga pagbatu ang ginaatubang sang mga mamumugon, mangunguma kag mamumugon sa uma sang Hacienda Luisita agud maagum ang pinakahandum nga tunay nga reporma sa duta.

Sa nagligad masobra isa ka tuig, ginatampukan ang paghimakas sa Hacienda Luisita sang mapintas nga kalakasan, masingki nga kabudlayan kag mabug-at nga sakripisyo, lakip ang pagbuhis sang madamu nga kabuhi.

Nagasulod subong sa bag-ong makasayan nga halintang ang pila ka dekada nang nga paghimakas sa Hacienda Luisita. Matapos ang masobra isa ka tuig nga welga, nakigareglo ang Hacienda Luisita Inc. (HLI) sadtong Disyembre 8 nga ihatag ang pangunahon nga mga demanda sang mga mangunguma kag mamumugon sa uma (*lantawon ang kaangot nga artikulo*).

Kag bunga man sang ila welga, naagum sang mga mamumugon sa uma sa asyenda ang malapad nga suporta sang ila panawagan nga ibasura ang *stock distribution option* (SDO). Sadtong nagligad nga Disyembre 20, ginpalig-on sang Presidential Agrarian Reform Council (PARC) ang desisyon nga ibasura ang SDO. Base sa desisyon nga ini, pagabaklon sang gubyrno ang 4,915 ektaryas nga kadutaan nga sakup sang Hacienda Luisita kag ipaidalum ini sa reporma sa duta.

Obligado nga maghimo sang amo nga desisyon ang PARC sa atubang sa di mahinago nga kabudlayan nga dulot sang SDO. Sugod pa 1989, ang SDO ginagamit sang pamilya Cojuangco agud likawan nga mapanagtag ang duta. Namenteran nila ang monopolyo nga pagpanag-ya sa duta. Amat-amat nila nga ginapalayas ang mga mangunguma kag mamumugon sa uma

kag nagsaylo sila sa komersyal nga gamit kag ispekulasyon sa duta.

Ang desisyon sang PARC inisyal nga kadalag-an para sa mga mangunguma kag mamumugon sa uma sang Hacienda Luisita.

Pero, maathag nga indi pa tapos ang ila paghimakas. Pagaatubangon pa nila ang mga maniobra sang pamilya Cojuangco, ang pagpamatuk sang iban pa nga dalagku nga asendero nga nagapatuman man sang SDO kag ang madamu nga sablag kag buslot sa pagpatuman sang layi para sa

reporma sa duta.

Insigida ginkwestyon sang HLI ang kinamatarung sang PARC nga magdesisyon angot sa sining halambalanon. Siling nila, korte lang ang may kinamatarung diri.


Sari-saring sablag kag palusot ang ginaimbento sang pamilya Cojuangco agud abangan ang aktwal nga pagpanagtag sang duta. Yara sa korte subong apela kag maniobra sang pamilya Cojuangco para indi epektibo ukon malusutan ang desisyon sang PARC.

Ginagamit man sang HLI ang halambalanon sang reklasipikasyon sang duta agud indi masakup sang Comprehensive Agrarian Reform Law (CRL) ang tubtub 67% ukon 3,290

ektaryas sang asyenda. Sadto pa nga

1995,
gin-

padeklarar na sang mga Cojuangco ang mga halambalanon sang asyenda bilang komersyal



Mga martir sang Hacienda Luisita: Ang mga kadalag-an sa Hacienda Luisita naagum paagi sa pursigido nga paghimakas kag wala duda sa pagsakripisyo. Pirme nga pagadumdumon sang pumuluyong Pilipino ang ila mga martir:

Jhavie Basilio, Jun David, Juancho Sanchez, Jesus Laza, Jimmy Pastidi, Adriano Caballero, Jessie Valdez

Ang masunod naman magkasunod nga ginpamatay bangud sa ila pangpulpitika nga panindugan kag angot sa welga:

Marcelino "Ka Marcing" Beltran, lider-mangunguma (Disyembre 8, 2004); Tarlac City Councilor Abelardo Ladera (Marso 3, 2005); Fr. William Tadena (March 13, 2005); Ben Concepcion, pangrehiyong lider-mangunguma (Marso 17, 2005); Florante Collantes, lider sang Bayan Muna (Oktubre 15, 2005); Ricardo Ramos, presidente sang CATLU (Oktubre 25, 2005)

kag residensyal, bisan nga halin pa 1988 gindumili na sa layi ang pagbag-o sang klasipikasyon sang tanan nga kadutaan nga natamnan sang tubo.

Sa kamatuoran, nabaligya na sang Cojuangco ang 594 ektaryas sang asyenda (sa kantidad nga P2 milyones kada ektarya) bilang komersyal nga kadutaan nga kabahin tani sang mga dapat ipanagtag sa mga mangunguma. Ang 500 ektaryas nga ini ginhimo nga subdibisyon sang Luisita Industrial Park kag ang 94 ektaryas ginbakal sang Bases Conversion Development Authority para sa Subic-Clark Expressway. Ginasukot na sang mangunguma kag mamumugon ang P321 milyones nga bahin sang benta sa duta nga dapat makadto tani sa ila katumbas sang ginasingling 33% parte nila sa mga sapi sang HLI suno sa anay kasugtanan sa SDO. Ang ginhatag lamang sa ila amo ang P37 milyones nga katumbas lamang sang 3% sang benta.

Sa pagpamatuk sang pamilyang Cojuangco sa desisyon nga ginbasura ang SDO, makalaum sila sa suporta sang iban pa nga dalagku nga asendero, ilabi na yadtong pareho nila nga nagapatuman sang SDO agud likawan ang pagpanagtag sang duta. Pinakadaku diri ang Hacienda Luisita. Tuman ang kahadlok sang iban pa na agalon nga mayduta kag kumprador nga gamiton sang mga mangunguma sa iban pa nga asyenda ang mga kadalag-an sa Hacienda Luisita agud mabasura man ang ila mga bersyon sang SDO kag mainsister man ang ila mga kinamatarung sa duta. Sa subong pa lang, pito na ka asosasyon sang mangunguma sa Negros ang nagpabutyag sang kagustuhan mabalewala man ang iskema nga SDO sa tagsa nila nga asyenda.

Ang desisyon sang PARC na nagabasura sa SDO gamay pa lang nga unang kadalag-an padulong sa pag-angkon sang ginahandum nga matuod nga reporma sa duta. Isa sa

Mga kadalag-an sang welga sa HLI

Sa atubang sang pila ka beses na mabaskog nga pagpamintas sang pamilya Cojuangco-Aquino kag ang rehimeng Arroyo, dalayawon ang kamuklatan, kaisog kag kalig-on nga ginpakita sang mga mamumugon kag mangunguma sang Hacienda Luisita sa pagpursiger sang ila ginapakig-away.

Sadtong nagligad nga Disyembre 8, masobra isa ka tuig halin sang maglupok ang welga, ginpirmahan, sa piketlayn mismo, ang kasugtanan sa tuna sang United Luisita Workers' Union (ULWU), Central Azucarera de Tarlac Labor Union (CATLU) kag maneydsment sang Hacienda Luisita, Inc. (HLI). Kadungan sang pirmahan ang pagbayad sang HLI sang mga ginademanda sang mga mamumugon nga back pay (pagbayad sang mga di pa nabayaran nga sweldo) kag iban pa nga nagakaapat nila nga batunon ng benepisyo. Nagtapos ang welga sa adlaw nga ina.

Nagbunga ang paghimakas sang mga mamumugon. Kadalag-an nila kag sang mga pamilya sa HLI ang masunod nga kaundan sang kasugtanan:

1) Pagbalik sa trabaho sang 34 nga upisyal sang CATLU kag 52 nga nabilin nga upisyal kag myembro sang ULWU nga ginpahalin. (Ika-34 nga upisyal tani sang CATLU ng dapat ibalik sa trabaho amo si Ricardo Ramos nga ginpatay sang mga pasista sadtong Oktubre 25.) Ginbalik ang ginpahalin nga 37 sakada, nga lunsay katapu sang ULWU, samtang magabaton sang *separation benefits* ang 15 permanenteng mamumugon kag liwat sila ngaempleyo bilang pana-panahon nga mamumugon sa uma. Magapabilin ang unyon kag ang 19 upisyal sang ULWU makabaton sang regular nga sweldo halin sa kumpanya samtang nagatungod sang lubos-panahon nga hilikuton sa unyon.

2) Pagbayad sang HLI nga magaabot sa P21 milyones sa masobra 700 membro sang CATLU. Lakip sa kantidad nga ini ang P15 pagsaka sa adlawan nga suhol halin Hulyo 1, 2004 tubtub sa pagkatapos sang welga, ang *one-time signing bonus* nga P13,000, Christmas bonus subong nga tuig kag iban pa nga benepisyo. Ang ULWU naman magabaton sang P8.2 milyones nga *back pay* kag mga benepisyo para sa masobra 5,000 nga mamumugonng myembro sini.

3) Paghatag kinamatarung sa ULWU nga anihon kag panginpuslan ang subong nga tanom nga tubo (*standing sugar cane crop*) ng nagabili sang P30 milyones. Dugang pa, pagabatunon ang mga tsapter sang ULWU sa napulo ka barangay nga nagabug-os sa asyenda sang tig-P200,000 bilang bulig pinansyal para sa sari-saring gastos sa pagtanum.

4) Pagpabilin sang kinamatarung sang mga mamumugon bilang mga *stockholder* (lakip sa mga tag-iya sang mga sapi) sang korporasyon.

AB

pinakadaku nga alatubangon nga sablag ang CARL na pumabor sa sahing agalon nga mayduta. Sa nagligad nga duha ka dekada, ang CARL gingamit lang agud tiplangon ang masang mangunguma kag ginadingot sa ila ang duta nga nagakaangay na sa ila.

Pareho sang ginapakita sang mga mamumugon, mangunguma kag ma-

mumugon sa uma sa Hacienda Luisita, ang ila mga ginahandum maagum lang paagi sang paghiliusa kag ululupod nga paghulag. Ang kadalag-an nila sa Hacienda Luisita kinahanglan mangin puhunan sang kahublagang mangunguma sa bilog nga pungsod agud liwat ibwelo ang paghimakas para sa tunay nga reporma sa duta sa bilog nga pungsod.

AB

Koalisyon nga maki-Arroyo, nagakapihak

Ang sobra nga pagkadalok ni Gloria Arroyo sa gahum nagabunga lamang sang labi pa nga pagsingki sang kontradiksiyon sa tunga sang rehimeng Arroyo kag sang pumuluyo kag sang kontradiksiyon sa kubay sang mga nagaharing sahi, kundi pati sang kontradiksiyon sa kampo mismo sang nagaharing hubon Arroyo. Nagresulta ini subong sa panibag-o nga pagpihak sa mismo kampo ni Arroyo.

Panibag-o nga masingki nga bunal kag madalum nga litik sa koalisyong maki-Arroyo ang ginadulot subong sang halos hayagan na nga pag-atras sang suporta ni Fidel Ramos sa rehimen kag ang “sikreto” nga pagpakigpulong kag pagpakig-isa na niya sa oposisyon para mapukn si Arroyo.

Sanday Ramos kag Speaker Jose de Venecia ang nagakapot sang mas daku nga mayorya sa nagapamuno nga koalisyon sa Kongreso kag sa likod sang rehimen—ang Lakas-Christian Muslim Democrats (LAKAS-CMD). May mga tinawo man si Ramos sa mga yabing pwesto sa gubyrno kag armadong pwesto. Pati sa Consultative Commission on Charter Change (ConCom) ng ginatukod ni Arroyo, kulang sa katunga ang mga tinawo ni Ramos. May ginalauman kag ginahanda man siya nga bahin sang armadong kusog sang gubyrno nga magatalikod sa rehimen. Madugay na nga napabalira nga may ginaplano nga kudeta si Ramos batuk kay Arroyo.

Indi madula-dula ang ambisyon ni Ramos nga bumalik sa direktang pagkapot ukon magtindog nga pwersa sa likod sang gahum. Ginhingalitan niya ang krisis sa pagginahum ni Arroyo sang tunga magbiya sadtong Hulyo 8, 2005 ang daku nga numero sang mga upisyal sa kabinete ni Arroyo—nga halin sadto ginatawag nga Hyatt 10. Gindunganan ini sang panawagan nanday anay presidente Corazon Aquino, Senate President kag Liberal Party President Franklin Drilon kag sang dalagku nga negosyante

nga tiglawas sang Makati Business Club nga magbiya na si Arroyo.

Ang pagkadto ni Ramos sa Malakanyang para “magtabang” kay Arroyo naghatag sang hingalit nga ligwa kay Arroyo nga nagdumdom katapusan na niya nga oras sadto.

Kabaylo sang iya suporta, nakuha ni Ramos ang konsesyon nga boluntaryo nga pagpanaog ni Arroyo sa gahum sa tuig 2007 kadungan sang pagbag-o sang porma sang gubyrno padulong parlamentaryo agud hatagan-dalan ang eleksiyong parlamento kag pagtukod sang bag-ong gubyrno. Pabor ang amo na pormula kay Ramos, nga nagaambisyon mangin *prime minister* ukon presidente sang bag-ong gubyrno.

Pero sang maglugdang ang ginaatubang niya nga pangpulitikang krisis, maabtik nga ginpahigad ni Arroyo ang konsesyon niya kay Ramos. Wala natay-og ang kadalukon kag katig-ahon ulo ni Arroyo nga magpabilin sa poder tubtub 2010 kag tubtub mahimo lampas pa diri.

Nangin maathag ang amo nga plano ni Arroyo sang iproponer sang mayorya sang iya ginnombrar sa ConCom ang “No-election” (No-el) ukon ang pagkanselar sa eleksyon


sa 2007 kag pagpalawig tubtub 2010 sa termino sang tanan nga mga napilian nga upisyal halin sa presidente panubo. Nagbukas man ang concom sa pagpadayon pa ni Arroyo sa poder lampas sa 2010 sa idalum sang sistemang parlamentaryo.

Mabaskog nga ginapamatukan ini ni Ramos. Gintawag niya ini nga “monumental blunder” (daku-daku nga pagsayup) kag naghatag siya sang ultimatum nga kinahanglan may maathag na nga deklarasyon si Arroyo sa iya pusisyon bahin diri pag-abot sang Enero 1.

Samtang, ginpauna na ni Ramos ang paghulag sang tampad nga tinawo niya sa pagpamuno sang retiradong heneral kag daan niya nga AFP

Chief of Staff kag Department of Defense Secretary nga si Fortunato Abat. Bisan pa nga daw kaladlawan ang pagdeklarar ni Abat sang iya “transisyunal nga gubyrno” kabaylo sang pagginahum ni Arroyo kag panawagan sa mga armadong pwersa nga talikuran na si Arroyo, senyales na ini sang pagkadto na sa antagonismo sang inaway sa tunga nanday Ramos kag Arroyo.

Ginhikayan kag wala sang ginapakita si Arroyo nga pagbag-o sa pagpamilit sini nga magpabilin tubtub 2010, nagsugod maghulag si Ramos sing hayagan sang palayo kay Arroyo kag palapit sa mga oposisyunista nga anti-Arroyo. Masobra duha ka oras nga nakighinun-anon si Ramos kanday Franklin Drilon kag



anay Senate Minority Floor Leader Vicente Sotto III sining Enero 2.

Luwas sa pagka-presidente sang Senado kag Liberal Party, si Drilon man ang pinuno sang maki-Arroyo nga paksyon sang iya partido kag kilala nga malapit kay Corazon Aquino. Si Sotto malapit kay Joseph Estrada kag sa napatay nga Fernando Poe Jr. Ginapagguwa ni Estrada na indi niya upisyal nga tiglawas si Sotto, pero maathag nga ginatiglawas ni Sotto ang mga pwersa nga maki-Estrada kag maki-FPJ.

Kadungan sang pagdugang ni Ramos sang presyur para magpasugot pasugot gihapon si Arroyo sa mga nakasugtanan nila nga kundisyon, naglagas na siya agud sakyan ang oposisyon kag ipwesto ang kaugalingon sa bag-ong gubyrerno nga igabaylo sa rehimeng Arroyo.

Ginapatawag ni Arroyo ang miting sang mga pinuno sang Lakas-CMD kag mga myembro sang partido sa Enero 14 sa katuyuan nga makonsolida ini kag mapahiliusa sa likod niya. Matambong si Ramos diri bilang Chairman Emeritus sang partido. Pero ang pagadalhon niya diri ang pagkunderan sa "No-el" kag sa pagpakatig-a ni Arroyo nga magpabilin sa gahum. Ang paghabig niya pakadto sa oposisyon sang daku nga bahin sang Lakas-CMD magadulot sang daku nga pagkapihak sa pangpulitika nga koalisyon ni Arroyo.


Samtang, nabalita man ang nagasunson nga pagpakigsugilanon kag nagabaskog subong ang rekrutment sang oposisyon sa mas madamu na nga mga kaupdanan ni Arroyo sa partido kag koalisyong pulitikal kag ang nagahana nga pagbiya sang mas madamu pa nga myembro sang kabinete ni Arroyo.

Sa kubay sang reaksyunaryong armadong kusog, nagabaskog ang demoralisasyon kag pagkadisgusto indi lang sang mga ordinaryo nga

Pagkontrol sa Meralco, pagguwa ni Arroyo

Ginpatampok sang Malakanyang sining Disyembre ang halambalanon sa pag-angkon kag pagkontrol na kuno sang gubyrerno sa Meralco bangud sa di-mabayaran nga daku nga atraso sini sa Napocor. Ginpagguwa sa midya ang plano nga kaptan na sang gubyrerno ang Meralco paagi sang bayluhanay nga *debt-for-equity* (sapi, kabaylo sang utang) para sa kuno mga di-mabayaran nga utang sang Meralco sa Napocor. Magakahulugan ini sang pag-angkon sa dugang nga 20% sang mga sapi sang kumpanya kabaylo sang P42 bilyones nga utang sini sa

Sundan sa "Meralco...", pahina 10



suldado kag manubo nga upisyal, indi sang pila nga nahanunga kag mas mataas nga upisyal militar.

Ginbyagyag sining Enero 3 ni Col. Efren Daquil sang Philippine Air Force (PAF) ang iligal nga pagbaton sang mas mataas nga upisyal sang PAF sang P45,000 kada bulan maluwas sa ila sweldo samtang P240 lang kada bulan ang alawans sang ordinaryong mga suldado. Ginbuyagyag man ni Daquil ang pagkadula sang P30 milyones nga pondo sang PAF sadtong 2004. Suno sa iya, madamu man nga nagakatublag nga mga elemento sa sulod sang PAF.

Antes sini, nagpalagyo sa bilangguan sadtong Disyembre 14 si Capt. Nicanor Faeldon, lakip sa mga bataon nga upisyal nga nagpasakup sa "pag-alsa sang Oakwood" sadtong 2003. Patimaan sang malapad nga disgusto sang militar sa garuk nga rehimeng Arroyo, hilway makahulag subong si Faeldon sa mga kampo militar kag mag-updanay ang mga ordinaryong suldado kag pareho niya nga bataon nga upisyal.

Suno man sa iya pahayag sang magpalagyo siya, magahulag siya para matukod ang isa ka mas malau-

man nga gubyrernong transisyon kag mahatagan-dalan ang mga basehang pagbag-o para sa ikaayo sang katilingban Pilipino.

Patimaan ang mga ini nga nagadamu ang mga elemento sa sulod sang militar kag pulisya nga maghulag batuk sa padayon nga pagginahum ni Arroyo, nagahanda nga talikdan ang *chain of command* kag hayagan nga batuan ang rehimen pag-abot sang panahon.

Bunga sang mga ini, labing nagahina, nagakahamulag kag nagakiya-kiya ang nagapagamay nga hubon Arroyo. Nagagamay ang posibilidad na matukod ang mas malapad pa nga koalisyon sang oposisyon para sa pagpukan sang nagagahum nga rehimen. Kadungan sini ang padayon nga pagpalapad kag pagpalig-on sang kubay sang mga militante kag progresibong organisasyon kag iban pa nga pwersang anti-Arroyo agud matuman na ang pagpukan sa peke nga presidente sa sulod sang tuig nga ini. Nagapanawagan ang mga militantenkag progresibong organisasyon sang sunod-sunod nga dalagkuan nga protesta sugod Enero 20. Nagahana nga magbunga ang mga ini sang panibag-o nga unos sa una nga kwarto sang 2006.

AB


Paniktik ni Bush sa pumuluyo, ginpakamalaut

Labi pa nga nagsingkal ang kaakig sang pumuluyong Amerikano kay US Pres. George Bush matapos akuon niya nga ginmandu niya ang pagpaniktik sa mga pagsugilanon sa telepono kag pagsululatan sang pumuluyong Amerikano.

Arogante ini nga gin-ako ni Bush sa pagrason nga kinahanglan kuno ini sa pagpangalap sang impormasyon nahanungod sa mga aktibidad sang mga “terorista” kag pagtumod sa iba pa nga posibleng “terorista”. Ginahimo lamang kuno ini sa ngalan sang “pag-amlig sa seguridad” sang US kag sang pumuluyo.

Madumduman nga sadtong 2003, gin-imbento ni Bush kag sang iya mga kahimbon ang estorya nga may *weapons of mass destruction* (mga ar-

mas para sa madamuan nga pagpa namad) si Saddam Hussein agud hatagan-rason ang pagsalakay sa Iraq. Sa subong, liwat ginagamit ni Bush ang kabutigan nga may plano nga magkuha ukon maghimo ang mga “terorista” sang mga armas kemikal, biolohikal, radyolohikal kag nukleyar agud magsabwag sang terorismo sa sulod sang US. Gingamit pa nga



pa mahug ang posibilidad no nga maghimo liwat ang al-Qaida sang pagpang-atake sa US pareho sang 9-11.

Mabaskog nga ginpakamalaut sang mga tagasakdag sa naging kahilwayan sibil, mga

Sundan sa “Bush...,” pahina 11

“Meralco...,” halin sa pahina 9

Napocor. Ang Meralco ang pinakadaku nga distribyutor sang kuryente sa pungsod.

Sa subong, nagaabot sa 15% sang Meralco ang kapot sang gubyrerno samtang 36% ang pagpanag-iya sang pamilyang Lopez. Kon madayon ang ginadihon nga *debt-for-equity*, kag makadto sa gubyrerno ang dugang nga 20% sang kumpanya, mangin halos katunga sang mga sapi sang kumpanya ang makadto sa gubyrerno.

Suno sa rehimen, wala nabayaran sang Meralco ang P42 bilyones nga balor sang elektrisidad nga kinontrata sini sa Napocor halin Disyembre 2001 tubtub katapusan sang 2004. Kabayaran ini sang 3,600 *megawatts* sang kuryente kada adlaw nga nakahanda isuply sang Napocor sa Meralco. Ginapangayo sang rehimen sa Meralco nga ihatag ang bilog nga kabayaran para diri, nakonsumo man ukon wala sang Meralco, amo man ang natipon nga interes halin diri. Wala ini nakonsumo sang Meralco bangud direkta ini nga nagakuha sang kuryente (bisan sa mas mahal nga sukot) halin sa mga gin-

tukod sang pamilyang Lopez nga kagalingon nga mga planta para sa paghimo sang kuryente—pangunahon na ang Quezon Power Philippines kag ang First Gas Holdings Corp. Ang indi pagkonsumo kag di pagbayad sang Meralco sa kuryente nga gintigana sang Napocor para sa Meralco ang ginadahilan sang Napocor kon ngaa naobligar ito nga pataas ang sukot sa kuryente kag kon ngaa man daku ang pagkalugi sini.

Mabaskog nga ginpangin-wala sang Meralco nga may utang pa ini nga P42 bilyones sa Napocor. Suno sa Meralco, nakig-areglo ini sa Energy Regulatory Commission (ERC) kag nagkasugot sila sining nagligad nga Septyembre nga P14.3 bilyones na lang ang pagasabton sang Meralco sa Napocor nga pagabayaran sini kabaylo sang pagsuplay sang Napocor sang kuryente sa Meralco sa sulod sang tatlo ka tuig. Ginpamatud-an ni Rodolfo Albano, *chairman* sang ERC, nga may amo sila nga naabot nga kasugtanan sang Meralco.

Nakibot na lang ang Malakanyang nga may ara gali nga amo nga kasug-

tanan sa tunga sang Meralco kag ERC. Bangud diri, gin-atras sang rehimeng Arroyo ang halambalanon sang pag-angkon kag pagkontrol sang gubyrerno sa Meralco.

Sa katapus-tapusan, nagatunga nga pagguwa lang sang rehimeng Arroyo ang halambalanon bahin sa pag-angkon kag pagkontrol sa Meralco. Gintuyo lang sang rehimeng Arroyo nga gamiton ang halambalanon kag pagkontrol sang gubyrerno diri agud ipresyur ang pamilya Lopez kag magpahamot sa mata sang publiko nga daw ginagabalak-an sang rehimeng Arroyo. Gusto lang sang rehimen nga ipiton ang pamilya Lopez bangud sa napanimahuan sang Malakanyang nga sikreto nga pagsuporta sini sa mga paghulag sang oposisyon para mapatalsik si Arroyo. Sining nagligad nga Nobyembre, nangin hayagan na ang pag-atakehay nanday Arroyo kag Eugenio Lopez III, ang nagatindog nga pinuno kag tiglawas sang pamilya Lopez.

(Lantawon man kaangot sini ang editorial kag ang artikulo nga “Baraghal nga pagpamwersa” sa Nobyembre 21, 2005 isyu sang Ang Bayan.)

AB

myembro sang oposisyon nga Democratic Party kag malapad nga pumuluyo sang US ang arogante nga pagdepensa ni Bush sa iligal nga pagpang-espiya sa pumuluyong Amerikano. May gana pa nga mangakig si Bush sa mga nagbuyagyag sa sekreto nga pagbantay sang mga ahensya nga paniktik sa kaugalingon sini nga pumuluyo. Nakaapekto kuno ini sa pagbatu sang gubyerno sang US sa terorismo gani mahimo nga magdulot ini sang daku nga kahalitan sa pungsod.

Ginainsister sang mga tagasakdag sang kahilwayan sibil nga samtang ginapahanugutan ang pagpaniktik sa mga partikular nga indibidwal sa idalum sang Foreign Intelligence Surveillance Act, kinahanglan anay ang mandamyento para diri halin sa mga korte. Antes diri, kinahanglan anay i-atubang sa korte ang maathag nga ebidensya nga ang mga pagpaniiran isa ka ahente sang nga dumuluong nga gahum. Ang pagpaniktika sa komunikasyon sang mga indibidwal nga wala nagaagi sa amo sini nga proseso kag wala sang mandamyento ginakabig nga krimen. Ginarason ni Bush nga indi na nila kinahanglan magkuha pa sang mandamyento sang korte pareho sang nasambit sa layi bangud nakataya kuno ang kahilwayan kag seguridad sang bilog nga pungsod. Wala ini gin-ugyuan sang US Congress Research Service.

Ginhimo ang iligal nga pagpaniktik sa idalum sang National Security Agency paagi sang mga *satellite*, elektroniko nga kagamitan paniktik kag mabaskog nga kompyuter nga sarang "magpamati" sa mga sugilanon sa telepono kag magpangita kag magbasa sang mga magkaduluda nga mga sulat sa *internet*.

Kadam-an sa mga ginabiktima sang pagpaniktik nga ini amo ang mga migrante kag bisitang Muslim kag bisan sino nga may itsurang Arabo bangud ginasuspetsahan tanan sang rehimeng Bush ang mga kaparehong rasa nila.

Malaba na katama sang listahan sang paglapak kag mga paglabag sang rehimeng Bush sa mga kahilwayan sibil sang pumuluyo sa US. Sa pag-angkon sang US sang papel nga "superpulis" sang kalibutan, lapnagon sini nga ginalapakan ang pungsodnon nga soberanya, kalayaan kag tawhanong kinamatarung sang mga pumuluyo sa pumuluyo. Wala rin nagakilala ang rehimeng Bush pati ang mga kinamatarung kag kahilwayan sibil sang pumuluyo sang US.

Samtang, ang baraghal nga paglapak sa mga kahilwayan sibil kag tawhanong kinamatarung sang pumuluyo sa US indi mabatas sang iban nga sanga sang gubyrerno kag pati mismo sang partido ni Bush.

Ginbalibaan sang US Senate ang pagpamilit ni Buh nga palawigon pa ang Patrito Act lampas sa 2005. Ang layi nga ini amo ang gingamit ni Bush nga pangunahong instrumento para mahatagan-ligalidad ang lapnagon nga paglapak sa mga kahilwayan sibil kag tawhanong kinamatarung sang pumuluyo sa US kag pati sa iban nga pungsod. **AB**

George Bush, bagsak sa sarbey sa US

Pinakamanubo ang ranggo sa popularidad ni US Pres. George Bush ikumparar sa mga pinakaulihi nga napulo nga presidente sang US, base sa sarbey sining ulihi sa pumuluyong Amerikano nga ginhimo sang National Qualitative Center sa Chicago, US. Suno sa sarbey, si Bush ang ginasigahum nga pinakamapang-away, pinakamalaut sa halambalanon sang ekonomya kag pinakainutil nga presidente sang US.

Ginasalaming sang iban pa nga bag-ong sarbey ang malapad nga negatibo nga paglantaw kay Bush sang pumuluyo sa US. Pangunahon nga ginapamatukan sang pumuluyong Amerikano ang agresyon kag okupasyon sang US sa Afghanistan kag Iraq sa ngalan sang "gera kontra-terorismo," ang lapnagon nga pagbinutig nanday Bush agud himuon nga rason ang paglunsar sang gera kag ang nagadamu nga kaswalti sang US samtang indi naman sa aktwal mapadaug kag di matapos-tapos ang gera.

Bunga sang mga ini, nagtibusok sa pinakanubo—39%—ang "approval rating" (tantos sang pag-apruba) ni Bush sining ulihi nga kwarto sang nagligad nga tuig.

Labaw ang kaakig sang pumuluyong Amerikano sang akuon sining ulihi sang mga upisyal sang gubyrernong Bush nga indi matuod nga may ila sadto nga impormasyon nga ang gubyerno ni Saddam Hussein nagatago sang "weapons of mass destruction" nga amo ang gingamit ni Bush nga rason sa paglusob sa Iraq.

Masobra 2,200 suldadong Amerikano na ang napatay sa Iraq. Sa pihak sang nagalapad nga panawagan nga paulion na ang mga suldadong Amerikano, ginapamilit ni Bush sining ulihi nga indi dapat hatagan kutod ang okupasyon sang US sa Iraq. Pero wala sang natiplang sa ginapamilit niya nga "nagmadinalagon" ang mga tropang US didto. **AB**



Mga Higaonon, nagbato sa kampanya sang AFP



PADAYON mga ginabatuan sang mga Higaonon sa North-Central Mindanao ang kampanya nga kontra-insurhensya nga ginalunsar sang 8th IB sang Philippine Army sa idalum sang pamumuno ni Col. Andre Colino, kahimbon si Gov Oscar Moreno sang Misamis Oriental.

Suno kay Kaupod Cesar Renerio, tagapamaba sang NDF sa North-Central Mindanao, pat-ud nga mapaslawan ang militar kag lokal nga reaksyunaryong gubyrno nga habigon ang tagipusuon kag isipan sang mga minorya tungod sa pagbastos sang mga ini sa tradisyon kag kultura sang mga Higaonon. Lubos man nga ginabalewala sang gubyrno kag militar ang madugay na nga mga reklamo sang mga minorya, upod ang pagtabog sa ila gikan sa mga ginaestaran kag ginauma nila sa kapatagan nga inagaw sang mga dalagku nga korporasyon kag agalon nga may duta. Ang mga masa nga Higaonon napilitan na subong mangabuhi sa kabukiran.

Sa subong naman, nagahana nga agawon liwt sang mga lokal kag dumuluong nga korporasyon nga pangturista ang mga duta sang katigulangan nga gina-atrasang sang mga ginpahalin nga Higaonon sa binukid nga barangay sang Lantad sa Claveria, nga plano nga kambyuhon sang gubyrno para sa mga proyekto nga pangturismo.

Bilang pakonswelo-de-bobo sa mga Higaonon nga maagawan sang duta, ginpaobrahan ni Governor Oscar Moreno sang mga kasilyas ang pumuluho kag ginpasementuhan ang mga karsada pakadto sa Lantad.

Bangud sa hayagan nga pagbalewala sang gubyrno sa kinamatarung sa dutang tumandok kag pagdesisyon-sa-kaugalingon sang mga pungsodnon nga minorya, labi nga nagpagsik kag nagbaskog ang pagpartisipar sa nagkalain-lain nga porma sang pagbulig sang mga Higaonon sa Partido kag sa Bag-ong hangaway sang Banwa sang pagpasulong sang rebolusyunaryong kahublagaan.

Lakip diri ang inisyatiba sang masang Higaonon sa paglunsar sang mga agaw-arms halin sa mga armadong pwersa sang reaksyunaryong gubyrno. Isa ka M16 ang ginagaw halin sa isa katapu sang lokal nga milisyang halin sa isa ka soldado sang 8th IB sadtong Oktobre 10 sa Sityo Tapol, Barangay Kibanban sa mabukid nga banwa sang Balinasag. Daw agila kadasig nga dinagit sang mga Higaonon ang riple nga ginsandig sang soldado sa dingding sang makipag-inuman siya. Sadtong nagligad nga Disyembre 18, nang-agaw liwat sang duha ka M16 halin sa 8th IB sa Barangay Lantad ang isa pa ka Higaonon nga myembro sang lokal milisya. Bangud sa kahuy-anan, gintago sang 8th IB sa midya ang mga insidente nga ini.

"Coalition of the willing," nagakitid

PADAYON nga nagagamay ang numero sang mga pungsod nga nagamentenar sang mga tropa para mangin kahimbon sang US sa padayon nga agresyon kag okupasyon sa Iraq sa ngalan sang "gerang kontra terorismo." Sa pagpapauli sang bag-o nga gubyrno sang The Netherlands sa 1,350 soldado sini gikan sa katung-anan sang nagligad nga tuig, 12 banwa na ang nag-atras sang mga pwersa nila halin "Coalition of the Willing" nga ginalakipan sang mga gubyrno sang iban nga pungsod nga kahimbon sang US kontra sa Iraq. Nag-umpisa ang koalisyon sa 38 nga nagpartisipar nga banwa sa kainitan sang pagpanalakay sang US kag UK sa Iraq sadtong Marso 2003.

Nagaplano man ang iban pa nga myembro sang koalisyon nga paulion o buhinan ang ila pwersa pangseguridad sa tuig nga ini. Kabulig sang 155,000 tropa sang US nga nagapanguna nga nagamentenar sang okupasyon militar sa Iraq, may 20,000 tropa nga nabilin pa sa Iraq ang iban pa nga myembro sang "koalisyon." Ang tatlo ka banwa nga may pinakadaku nga pwersa sa Iraq luwas sa US kag UK nagaplano na nga paulion ang ila mga tropa sa 2006, lakip ang South Korea (3,200), Italy (2,900), kag Poland (1,500). Pati ang UK, nagapangunang alyado sang US sa agresyon kontra sa Iraq kag may 8,500 tropa didto, nagaplano man nga paulion na ang tropa nila halin sa Iraq sa tuig nga ini.

Naga-insister man ang mayorya nga pumuluho sang Japan nga paulion na ang mga tropa sang Hapon. Sa isa ka sarbey, tatlo sa apat ka Hapones ang nagasiling nga dapat na nga paulion ang 600 nga tropa nila sa katung-anan sang tuig nga ini.

Ang pagpagamay sa numero sang tropa nga ginapabilin sa Iraq sang iban pa nga myembro sang "koalisyon" nagapakita sang pagluya sang suporta sa gerang agresyon sang US pati halin sa mga pinakamalapit nga kaalyado sang gubyrno sini. Lalo nga gin-uyog ang suporta nga ini dulot sang padayon nga belnerabilidad sang madamu nga pagkalutos sang mga pwersang mapanakop sa atubang sang mga atake sang mga patriyotikong Iraqi. Luwas sa sobra 2,200 soldado sang US ang napatay, may sobra 20,000 pa nga pwersa sang US nga napilasan. Mga 200 tropa naman ang napatay halin sa pwersa sang iban pa nga myembro sang "koalisyon."

**ANG****Bayan**

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Edisyong Hiligaynon
Tuig XXXVII No. 1
Enero 7, 2006
www.philippinerevolution.org

Editoryal

Angkunon ang mas dalagku nga kadalag-an subong nga tuig

Sa basehan sang mga signipikanteng pagsulong sang 2005 kag nagligad nga mga tuig, yara sa pusisyon ang Partido, ang Bag-ong Hangaway Banwa, ang rebolusyonaryong kahublagang masa kag ang nagalapad nga nagahiliugyong prente para sa labi pa nga bumwelo kag mag-angkon sang mga breyktru sining 2006 kag maabot nga mga tuig.

Sa nagligad nga tuig kag ilabi na sa ulihing kwarto, tumampok ang mga kadalag-an sa patag sang armadong paghimakas bunga sang pagbwelo sang mga taktikal nga opensiba sa bilog nga pungsod. Kadungan sini, nag-angkon sang dalagku nga kadalag-an sa pagpasulong kag pagpalapad sang nagahiliugyong prente sa paghimakas para pukanon ang bulok kag brutal nga papet nga rehimeng Arroyo. May dalagku nga pag-uswag man sa paghulag sang ligal nga demokratikong kahublagang masa. Kina-



hanglan na lamang sini nga dugang pa nga makabwelo tubtub masarang-gan na sini pukanon ang ginakangil-aran nga rehimeng Arroyo.

Sa tuig nga ini, ginalauman naton maangkon ang mas dalagku nga kadalag-an kag breyktru sa

nagkalain-lain nga patag sang rebolusyonaryong hilikuton. Hugot ang panawagan sang Partido sa bilog nga katapuan, sa hangaway sang banwa kag sa bilog nga rebolusyonaryong kahublagan nga sistematiko nga himuon ang mga pagplano kag ubos-

***Mga tampok
sa isyu nga ini...***

**32 armas, naagaw sg
BHB sa Leyte**

PAHINA 3

**Padayon ang paghi-
makas sa Hacienda
Luisita**

PAHINA 6

**Kampo nga maki-Ar-
royo, nagakapihak**
PAHINA 8

Mga instruksyon sa paglilimbag

1. Ang **sinundang pahina**, na eksaktong kopya ng pahina 1 maliban sa mas mapusyaw ang *masthead* o *logo* ay para sa mga gumagamit ng *mimeo machine* o naglilimbag sa paraang *v-type*. Idinisenyo ito para hindi madaling makasira ng istensil.

2. Pag-*print* sa istensil:

- a) Sa *print dialog*, i-check ang **Print as image**
- b) Alisin ang *check* sa **Shrink oversized pages to paper size**
- k) I-click ang **Properties**
- d) I-click ang **Advanced**
- e) Tiyaking naka-set sa **100%** ang **Scaling**
- d) Ituloy ang pag-*print*

3. Hinihikayat ang mga kasama na ipaabot sa patnugutan ng *AB* ang anumang problema kaugnay ng paglilimbag sa pamamagitan ng *v-type*. Magpadala ng *email* sa *angba-yan@yahoo.com*